

Karl Ettlinger (1882-1939)

In der Verzweiflung

- Es is e Mann in unsrer Schdadt,
Der sechs gesunne Buwe hat.
Alljährlich hat er ään erzeigt,
– Des mecht em kääner nach so leicht.
- 5 Doch, wie's schonn war von Weltbeginn:
's gibbt Leit, wo nie zefridde sin.
So hätt der Mann in unsrer Schdadt
Statt sechs gern *siww*e Schdick gehadt.
Beim Siwwente schdeht nemlich Pat
- 10 Der Kaiser hiezeland im Schdaat.
Drum hat der Mann ääch schdets geredt:
»Kää Mädche! Nor kää Mädche net!«
– Im ehrschte Monat lääft er rum,
Wie ääner vom Banopdigum
- 15 Unn säggt: »O Frääche, hääßgelibbt,
Wann's diesmal nor kää Mädche gibbt!«
»Nää,« säggt die Frää unn falt die Schdern,
»Es werd derr schonn e Lausbub wern.«
Im zwette Monat fängt der Mann
- 20 Nerwös ze wern allmählich an
Unn seifzt unn denkt von frieh bis schbät:
»Wann's nor e Biebche werde dhät!«
»Ja,« säägt die Frää unn falt die Schdern,
»Es werd derr schonn e Lausbub wern.«
- 25 Unn immer näher kimmt die Zeit,
Der Klapperschdorch is net mehr weit,
Unn immer lamendiert der Mann:
»Frää, bring mer nor kää Mädche an!«
– Da äänes Dags schdeht vor der Dhier
- 30 Der Mann unn zawwelt vor Begier,
Dann drin – o Glick! dann drin – o weh –
Da is der Schdorch bei seiner Frää.
Uff äämal rufft's: »Schorsch, komm erei!«
– »Was is es dann?« – »No, was werd's sei,
- 35 Guck, was Dei Frää so folgsam war:
Es is e *Schwestern-Zwillings-Baar!*«
Da fällt der Mann bald dorch die Dhier:
„O Frää, des is net schee von Dir,
O Frää, was hastde da gedhaa,
- 40 Was fang ich mit zwee Mädcher aa?
Jetzt kimmt der Kaiser net bei uns,
Jetzt war die ganze Mieh' umsunst.«
(276 words)

Quelle: <https://www.projekt-gutenberg.org/ettlingk/frankfor/chap031.html>